



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Epistola Friderici Regis Siciliae ad homines de Monteflascone.

**urn:nbn:de:hbz:466:1-20006**

promovendis; & eis etiam districtè prohibeas ne ad ordines taliter audeant convolare. Quòd si contra prohibitionem tuam venire præsumperint, executionem eis ordinum susceptorum taliter interdicas. Datum Laterani XV. Kalendas Octobris.

*EPISTOLA FRIDERICI Regis Siciliae ad homines de Montefalcone.*

*Epist. 184. Horatur eos ut sine obedientia Summo Pontifici.*

**F**redericus Dei gratia Rex Siciliae, ducatus Apuliae, & principatus Capuae, hominibus de Montefalcone fidelibus suis salutem & dilectionem. Cum carissimi in Christo Patris nostri Domini Innocentij Summi Pontificis & Ecclesiae Romanae circa nos & regnum nostrum non modica jugiter beneficia sentiamus, in quibus possumus grata sibi volumus filialis devotionis vicissitudine respondere, & tam regaliter quam humiliter ejus implere beneplacitum voluntatis. Gaudemus autem quòd, sicut accepimus, ad fidelitatem matris vestrae & ipsius Summi Pontificis humili curastis devotione redire, & in ea fideliter & firmiter permanetis. Ne autem de juramento quod nobis præstitisse dicimini, in posterum dubitetis, præsentibus vobis duximus litteras destinandas, quibus & affectum nostrum exprimimus, dum id gratum scribimus nos habere, & tanquam Ecclesiae filij, vos ad fidelitatem ejus regaliter exhortamur; monentes ut sic in ea persistere procuretis, ut non ex temeraria levitate sed ex deliberatione discreta potius ad id videamini processisse. Datum Panormi XXII. mensis Junij, secundae Indictionis.

*CAPITULO PENNENSI.*

*Epist. 185. Quod ipsorum electus Episcopus, qui ante confirmationem ministrabat, privatus sit.*

**Q**ualiter post obitum bonae memoriae Pennensis Episcopi Ecclesia vestra vacante, receptis prius super electione faciendis litteris nostris, Primitivum vestrum vobis elegeritis in pastorem, vos tanquam auctores electionis ipsius plenius cognovistis. Verùm quoniam electus à vobis, ante confirmationem obrentam, administrationi episcopatus se irreverenter immiscuit, & tam à Clericis quam à laicis juramenta recepit, non attendens quòd secundum Apostolum nemo sibi debeat honorem assumere, sed qui vocatur à Deo tanquam Aaron, nec donum scientiae Pontifici con-

*Cap. Qualiter de electione.*

veniens fuerat assecutus, cum juxta verbum dominicum, qui fecerit, & docuerit, magnus vocetur in regno caelorum, postquam nobis eundem presentastis electum, sufficienti examinatione praemissa, communicato fratrum consilio, electionem de ipso factam exigente justitia duximus irritandam, quicquid ob eam vel ex ea secutum est denuntiantes penitus non tenere. Ne autem gregi dominico diu desit cura pastoris, & ex defectu ipsius Ecclesiae vestra incurrat dispendium & jacturam, universitati vestrae per apostolica scripta praecipiendo mandamus quatenus convenientes in unum, sicut moris est, & Spiritus sancti gratia invocata, virum idoneum, & qui vita & scientia sit sufficiens pontificali oneri & honori, post receptionem praesentium infra mensem in patrem & pastorem animarum vestrarum per electionem vobis canonicam assumentes, electum ipsum nobis postea praesentetis, à nobis, ut dignum fuerit, vice regia petitori consensum, & confirmationem auctoritate apostolica recepturi. Alioquin aliquos ex vobis ad praesentiam nostram ex parte omnium transmitti volumus & mandamus, secundum assignationem nostram pastorem idoneum recepturos. Datum Laterani XI. Kal. Octobris.

*FESVLANO EPISCOPO.*

*Epist. 186. Committitur ipsi cognitio cujusdam causae.*

**C**um ex conquisitione dilectorum filiorum fratrum Camaldulen. dudum ad nostram notitiam pervenisset quòd praetextu cujusdam chartae, quam Prior eorum ipsis nescientibus fecisse proponitur, filij R. de Galbin. castrum Castilionis sibi contenderent cum ejus curia vendicare, atque Camaldulen. heremum ex hoc multipliciter praegravarent, nos venerabili fratri nostro Aretin. Episcopo dedimus in mandatis ut nisi praefati nobiles possessiones easdem fratribus ipsis restituerent, quemadmodum tenebantur, ipse ad hoc eos per censuram ecclesiasticam cogeret, appellatione remota, justitia mediante. Verùm, sicut idem nobis Episcopus suis litteris intimavit, postquam praedicti nobiles ab ipso vocati nostras litteras transcripserunt, utraque partium praefixo termino in ejus praesentia constituta, & Priore Camaldulensi plenè factum narrante, unus eorum videlicet ad objecta respondit; & post multa provocantes & recu-